

Baauwvakkersangst

n verhaal ien t Grunnegers deur Bé Kuipers

Mien buurman is zien hoes aan t verbaauwen. Stoabels baauwmatrioal stoan bie der stroat en haile dag vremde auto's op parkeerhoaventje en op t gazon. Lewaai van sleuphoamer en cirkelzoag, geklop en geboor, stof en rommel rondomrond zien hoes en aal zukswat. Hou dat t ter bie hom omweg gait, dut mie denken aan onze aigen verbaauwen, n joar of tien leden. Doar heb ik dou n stukje over schreven veur de website van mien kantoor van dou. En dij heb ik nou overzet ien t Grunnegers.

t Is alweer vekaanzietied en ik blief thoes van t joar vanwege onze verbaauwen. Aannemer en installateur, dakdekker en stukedor binnen kloar en vot. Nou is t mien beurt - en mien vrouw heurent ook - veur t ofwaarken van alles: schuren, vaarven, behangen, holten parketvloer leggen en plinten oftimmern.

Trauwens, ik bin wel blied dat dij baauwvakkers nou vot binnen. Oardege lu heur, doar nait van. Mor men het toch tiedstieden vremden over vloer. En doar mout je over kinnen. Ik kin dat wel n beetje, ik zit zulf ien t baauwvak. En mien vraauw kin der gelukkeg ook oardeg goud over, alewel zai der meer mit optrekken mos as ik, van ik was overdag mainstied vot, noar kantoor of noar n baauwproject.

Mor t was n òfzain. Ales wer van stond ofaan zunder veul omhaal aanpakt. Tiepies baauwvakkers, nait proaten mor doun. Mor dat betaikende ook dat ik sums ienains veur grode verazzens kwam te stoan. Ze waren der nog mor net en wie keken even nait en doar lag haile achtermuur van koamer al ien dikke stinkloeten op blaikveld. Ston t ber ienains op n aander stee, van ze mozzen bie buizen van verwaarming. Was der zomor ienains gain gas of stroom, of t wodder was der òf.

Sloten kovvie gingen der deur en meters kouk ter laangs, van dat volkje arbaaide haard en ze aten en dronken der ook tegen. En ik wol dij timmerlu en monteurs geern te vrund holden, van zai hebben t veur zeggen. Wat zai besloeten gebeurt, ook al stribbel ik wel ais wat tegen en ook al was ik zulf opdrachtgever. Zai hebben heur principes, heur ienzichten, heur vakmanschap. Tja, wat mout ik den?

En dat was nog nait ales. Haile dag n stuk lewaai bie t sleupen, oren toetten mie dervan. En overaal modder, cement, kaalk en zaand deur t haile hoes. Ien t begun mouken wie ale oavends boudel zo goud meugelk weer schoon. Mor ale mörgens was t noa n zetje net zo haard weer smereg en vies.

Noa n dagofwat bin we der mor mit stopt en deden we ien t weekend allenneg nog dikste. Wie waren ientied hildaal verslonsd en accepteerden noodgedwongen din mor dij rötzood en rommel. Kaalk zat ien borden en t eten knizzelde onder koezen. En ik dee snaachts gain oog dicht vanwege t klabbarn van t dekklaid veur t open gat ien muur van koamer. Moien dokter, wat n toustand. t Mout eerst maal worden, veur t mooi wordt, zegt n Grunneger spreekwoord.

Zo hebben wie kennizzen, dij doar dus hildaál nait over kinnen. Zai lieden aan n zogenoamde baauwvakkersfobie. Op n zeker mement zollen zai vaarvers ien hoes kriegen veur n luk kerwaaike. Zulf doun was gain keus, hai kin nog gain hoamer vasthouden, loat stoan n vaarfkwast en zai het ook twij linkerhanden. Ze binnen aans loos genog en hebben ook wel wat centen. Zoudonde hoalen zai altied vaklu ien hoes veur t kluzzen. Mor doar hebben ze den wel weer veul muite mit...

Heur perbleem was, haile dag van zukke kerelachtege, zulfverzekerde lu ien hoes. Hou kin je zo normoal meugelk tegen dij kerels doun? Tegen wel mout je proaten en wat mout je ien vredesnoam zeggen? Doun of der niks aan de hand is? n Vrezelk veuroetzicht veur heur. Zai hebben der om löt en t löt trof hom. Hai mos thoes blieven, zai kon noar t waark, gelukkeg.

Snaachts terveur kon e eerst nait sloapen, gooide hom mor aal weer op aander zied. Loader dreumde hai van dikke, grode kerels mit laank hoar en dikke snorren, tatoeëerde aarms en handen as kolenschoppen, dij op zien veurdeur stonden te beuken. Mit radio keihaard aan

van: 'WE WILL, WE WILL ROCK YOU...'

Hai kon t op n duur nait meer volhouden ien ber en het, as oflaiden veur homzulf, wat handege tips opschreven. Wat je doun kinnen om joe n holden te geven ien hoes, bievueurbeeld: drok bezeg wezen mit pepierderij, zodat men dij waarklu nait opmaakt. Serieuze geluden moaken oet n aangrenzende koameren haard roupen van: "Ik bel nog oven over dij vergoadern van guster...". Kerwaaike opbedenken: noar braivebus, of glasbak, en gespreksonderwaarken verzoameln veur bie t kovviedrinken (voetbalen, auto's, lekkere mukkels, vekaanziebestemings, schune bakken, tv-series).

Veul fouten, dij doarbie moakt worden, bennen: joe verstoppen onder baank of ien houk achter gardienen (niks weerd, ze zain joe op n duur toch wel en men kin doar ook ja nait doagen achter staan- of liggenblieven), overbluvven mit roege toal en onverschilleg gedrag (stoer om vol te holden as eerzoame börger), of - slimmer nog - haile dag ien FC Grunnen-outfit rondlopen mit n vles bier ien haand (allenneg mor as echte fan op te brengen), of - nóg slimmer - joe opzichteg omringen mit seksattributen as condooms, dildo's en foto's van noakende vraauwen (kiek oet, t wordt deurverteld en joen noam ligt gaauwachteg te grabbel). Nait doun dus!

Oetaindelk is der dij dag haildaal niks biezunders gebeurd. De man is ien noa-naacht toch nog ien sloap valen achter zien bureau. Zien vraauw het vaarvers der smörgensvro zachtjes ien loaten (haile keurege minsen, netjes en beleefd) en dou hai op n duur weer wakker wer, waren vaarvers al laank weer vot. Zien vraauw het vaarvers mor verteld dat heur man haile naacht het zitten te schrieven aan n bouk. n Bouk over ain of aander fobie...